

## 10 ASO TALOSAGA – 2018

### Aso Fitu\_7

## O le Ufi Fatafata

Le au uso e, 'ou te 'ai'oi atu 'iā te 'outou i le suafa o lo tatou Ali'i o Iesu Keriso, 'ina 'ia tasi la 'outou 'upu uma lava, 'ina ne'i i ai ni māseiga 'iā te 'outou; a 'ia maopopo lava i le loto e tasi ma le manatu e tasi. **1 Korinito 1:10**

O ma'a e 12 o le faatusa o ituaiga e 12 o Isaraelu sa teu i le ufi fatafata e lata i le fatu o le Osi Taulaga Sili. E tatou te a'oa'oina mai ai le taūa tele o lo tatou galulue faatasi, ia maopopo i le alofa o Keriso, ma faailoa lea alofa i tagata, i totonu ma fafo o le ekalesia.

O le mea lilo o lo tatou manuia i le galuega a le Atua o le a maua lea i le o gatasi o galuega a o tatou tagata. E tatau ona maopopo se galuega. O totino uma o le tino o Keriso e tatau ona faia lana vaega i le galuega a le Atua, e tusa o le agava'a ma le mafai na tu'u i ai e le Atua ia te ia. E tatau ona tatou o faatasi, soosoo tau'au, ma tasi le loto e tete'e atu i faasalavei ma faafitauli.

Pe afai e faatino galuega a tagata Kerisiano ma faaali le tasi, aga'i i luma ma le tasi, i lalo o le taitaiga o le Mana e tasi, mo le faataunuaina o le faamoemoe e tasi, e ono mafai ona latou suia le lalolagi. (*Christian Service*, p. 75)

E leai se isi galuega maualuga e pei o le galuega faatala'i, aua e faatinoina i se tapula'a e sili ona maualuga. E manaomia e i latou uma e faia lea galuega le iai i lalo o le pule'aga a le Agaga Paia. E leai se ola faasausili. O le ā ea se mea o ia i tatou e le i maua mai ia Keriso? Ia tatou alolofa e pei o se au uso, ia faailoa lo tatou alolofa e ala i le fesoasoani o le tasi i le isi. E tatau ona tatou faaaloalo ma faamaulalo. E tatau ona tatou o faatasi, i se maōpopoga e tasi. E na o i latou e soifua i le tatalo a Keriso, ma tino mai i le auala e ola ai, o le a mafai ona tu atu i taimi e o'o mai ai tofotofoga i le lalolagi. O ē faasausili latou te tuuina atu i latou i le mana o Satani e sauni e talia ana taufaaseseēga uma. O le fetalaiga mai le Alii mo Ona tagata, ia siitia i luga le tapula'a ma ia maualuga pea. Pe afai tatou te faalogo i Lona siufofoga, o le a ia galue faatasi ma i tatou ma o le a faapaleina i le manuia a tatou taumafaiga. E tatau ona maua e i tatou le sosia o faamanuiaga mai le lagi ia tatou galuega ma ia teuina lo tatou oa i tafaane o nofoalii o le Atua. (*The Colporteur Evangelist*, p. 25)

"Inā fa'a'ato'atoa mai ia e 'outou lo'u 'oli'oli, i le gatasitasi o o 'outou manatu ma le alofa e tasi i le loto gatasi, ma le mānatunatu i le mea e tasi. 'Aua ne'i faia se mea e tasi ma le finau vale, ma le mitamita fua; a 'ia ta'itasi 'outou ma manatu ma le loto maualalo, 'ua sili nisi 'iā te ia.'" (Filipi 2:2, 3)

Ua tele tele le agaga fia tutoatasi i le tele o tagata avefeau. E tatau ona tuuese lea agaga, ae ia tutū faatasi auauna a le Atua. Ua tele le fesili lenei o lo o fesiligia pea: "O a'u ea o se leoleo o lo'u uso.?" O le tali a le agelu, "Ioe, o oe o le leoleo a lou uso. Sa tatau ona e leoleo lelei lou uso e ala i lou amanaia o ona manaoga, ma tausisi i le agalelei, ma le loto alofa ia te ia. Ia oulua o faatasi, ia o faatasi." O le finagalo o le Atua na faia ai le tagata ina ia loto malamalama ma faamaoni, e aunoa ma se faafoliga, ae ia agamalu, loto maualalo ma le loto faigofie. O le tulafono faavae lea o le lagi e pei ona sa faatonuina ai e le Atua. (*Gospel workers* (1892), p. 259)

Source Link: [www.revivalandreform.org](http://www.revivalandreform.org)

Samoan Version: [www.asamtv.org](http://www.asamtv.org)

## 10 ASO TALOSAGA – 2018

### Aso Fitu\_7

Ua tele ina maalili loto o tagata ma faatupuina le fia ese – ua tele le agaga lea “ou te le kea” o lo o tupu i tagata o lo o ta’ua o Kerisiano. E tatau i tagata uma ona āmanaia le isi ona uso ā tagata, ma ia tausia ma le loto faapelepele manaoga o isi ona uso. “Ia fealofani.” Ona mafai lea ona tatou tu atu i faafelavei a Satani. I taimi o sauaga ma le teena o i tatou, aua lava ne i o tatou ‘au ma le ‘au taufāifāi, pe faatasi atu i le vaega a lē sili ona tete’e, aua o le latou lava galuega faapitoa le tautuuāi ina ia faalumaina ma ta’uvalea le au uso.

Mo tagata totoe uma i lenei tausaga, ia alualu i luma le taumafai e matuā faaleagaina vaega ola o a’a o le loto leaga, mai ia tanumia faatasi ma le tausaga tuai. Ia amataina le tausaga fou i le loto filemu, ma le loloto o le alofa mo tagata uma o le aiga o le Alii. Ia ō faatasi. “O lo tatou maopopoga, e malosi ai; o le fevaevaea’i e malepe ai.” Ia maualuga le tapula’a e te tu ai ia sili atu nai lo le mea sa iai muamua. (*Our High Calling*, p. 370)

Pe afai e mafai e Satani ona taufaaleaga i ē ua ta’ua o tagata o le Alii, e faapena foi ona fesoota’i e pei o se mea faafefeteina mai le isi i le isi. Aua lava ne i tuua se avanoa i le agaga o le taufaaleaga, auā o le galuega lea a Satani. O le taimi e talia ai, o le taimi fo’i lea e tupu ai le feitaga’i, felotoleagaa’i, ma le faufauga o mea leaga uma o le a soso’o mai ai.

Ia ō faatasi, o le faatonuga lea mai le Ta’ita’i ‘au o lo tatou faaolataga. Ia ō faatasi. Aua fo’i, so o se mea e iai se maopopoga, e iai fo’i ma le malosiaga. O i latou uma o lo o i le itu a le Alii e ao ona ō faatasi. E iai se manaoga mo le maopopo atoatoa, ma le alofa i le va o tagata talitonu, ma e so’o se mea lava e tula’i mai ai ni maseiga, o mea ia a le tiapolo. O le fuafuaga lava a le Atua le tasi o Ia ma Ona tagata e pei lava ona tasi le lalā ma le vine o lo o pipii atu iai. O lea fo’i e tatau ai ona tasi ai le isi ma le isi. (*Selected Messages*, book 3, pp.351, 352)

Ia saili tagata uma ina ia avea ma tali o le tatalo a Keriso: “ina ‘ia tasi i latou uma, fa’apei o oe le Tamā o i totonu ‘iā te a’u, o a’u fo’i o i totonu ‘iā te oe” O le a ea lenei maopopoga! O le tali mai a Keriso: “O le mea lea e iloa ai o outou o o’u so’o, pe afai tout e fealofani.” (*Testimonies for the Church*, vol. 5, pp. 488, 489)